



Anita Mazzetta dal WWF Grischun, Jon Pult, il president da la ps grischuna ed il cusseglier dals chantuns Stefan Engler han discutà davart la candidatura per l'olimpiada en il Grischun.

FOTO RTR, F. BELOTTI

«Il sulet che resta persistent èn ils daivets»

La Regiun Grischun Central ha envidà mesemna a Casti ad ina occurrenza d'infurmaziun per ils Gieus olimpics 2022. L'interess è stà grond, passa 200 persunas han visità la saira cun ina discussiun da podi. Tranter auter è er stada preschenta *Vreni Schneider* ch'aveva gudagnà aur als gieus olimpics da Calgary il 1988 ed a Lillehammer il 1994. I saja ina schanza unica per la Svizra dad organisar gieus olimpics, ha ditg *Vreni Schneider* envers il Radio Rumantsch. «Sch'insatgi sa far quai, alura è quai il Grischun», uschia *Schneider* vinavant. Ulteriurs aderents per gieus olimpics eran preschents a Casti, uschia *Heini Hemmi* e *Walter Tresch*, omadus anteriurs participants d'olimpia.

Tema da memia blers daivets

Da la vart dals adversaris da gieus olimpics èn stads a Casti *Anita Mazzetta* dal WWF Grischun e *Jon Pult*, il president da la Partida socialdemocratica dal Grischun.

«Il sulet che resta persistent a lunga vista èn ils daivets», ha ditg *Anita Mazzetta*. Er *Jon Pult* na sa entschaiver nagut cun gieus olimpics. «Ils gieus èn surdimensiunads e betg adattads per ina regiun alpina», uschia *Pult*.

Il Surses pudess profitar

Avessan ils Gieus olimpics 2022 da daventar realitad pudess tranter auter profitar il Surses: Tenor il cusseglier dals chantuns *Stefan Engler* pudessan ils sviaments planisads da Beiva e Mulegns vegnir realisads anc avant l'avertura dals gieus olimpics. Tenor *Engler* profitass er la Viafier retica. Uschia vegniss la flotta da vaguns modernisada pli spert che spetgà. *Stefan Engler* è per ils gieus olimpics: «Mo mintga segunda u terza generaziun survegn la pussaivladad dad organisar gieus olimpics.» Quella schanza stoppian ins tschiffar, era sch'i dettia betg mo avantatgs cun ils gieus olimpics, ha ditg *Engler*.